



焦太史編輯國朝獻徵錄卷之五目錄

公一世封公續封世侯

魏國公徐達

徐輝祖

定國公徐增壽

徐景昌

黔國公沐英

沐春

沐晟

沐斌

沐琮

沐崑

成國公朱能

朱勇

朱儀

朱輔

朱希忠

英國公張玉

張輔

鄂國公常遇春

常茂附

曹國公李文忠

李景隆附

衛國公鄧愈

信國公湯和

湯胤勳附

全校

刊行

焦太史編輯國朝獻徵錄卷之五目錄終

焦太史編輯國朝獻徵錄卷之五

公一

世封公

續封世侯

特進光祿大夫左柱國太傅中書右丞相征虜

大將軍魏國公贈中山王謚武寧徐公達神

道碑

御製

大明中山武寧王姓徐氏諱達鳳陽府鳳陽縣人家

世農業王年二十有二值元末兵興歲癸巳朕集義

旅王來麾下朕視其所以周旋幾二年動靜語默悉

超羣英於是命為帥首凡有徵征以代朕行又幾一

載明年乙未朕被敵所執敵之帥首亦為我軍所執

明日王來以身代朕歸縱敵帥首易王還已而後朕
渡江下采石定太平時機務浩繁姑孰之郡密邇大
江況元帥首蠻子海牙率舟師以拒江面爲朕肘腋
之患不暇率兵西征乃命王爲將擇精兵數千東取
溧水溧陽王兵至守者不戰民庶咸安明年丙辰春
二月敗元舟師於采石王仍屯溧水三月召王從征
建業越十日庚寅師入建業越七日丁酉命爲大將
浮江而下水陸並進東取京口大破元師京口已定
東探浙右時張士誠擅稱名號遣將已據毗陵旌旗
相望其守者潛遣間諜誘我斥堠王察知遣使歸告

賊勢少窘益兵可不朕遣戰將千餘員甲士十三萬
師徒會合圍毗陵張士誠自姑蘇發其弟張九六將
兵數萬來援王遣兵逆戰不移時破之生擒張九六
城守猶堅朕復益新附二萬帥首密從傾營入城助
彼來戰初我軍環其城而營之因新附者叛四方去
其三獨王固守其南開平王猶營東南外一舍之餘
扼彼援兵尚未驚疑聞新附者叛寇迫王營王拒守
且戰開平自外來援內外夾攻大敗其衆擒其守將
張德餘軍敗入其城王復還而困之士誠自姑蘇遣
將呂珍夤夜入城督兵以守與王相抗初彼軍雖少

糧且足用戰守益堅及誘降入軍多糧少戰且狐疑
丁酉春守將呂珍潛遁城下師旋復遣征寧國城圍
援至王發兵扼要而戰援者敗俘斬者衆旬日城降
宣城亦附凱旋時四方羣雄甚多朕固守江東數郡
命王秣馬厲兵以觀四方之勢又明年戊戌命王黠
兵固守建業朕親下浙東金華旣平六月師未幾還
遣王西征兼程水陸並進徼北秋命王西征池州師
抵而平陳友諒遣兵來救斬首萬級生擒三千餘時
張士誠發兵來寇宜興城陷遣王將兵復取師抵城
下不旬日城復生擒三千餘皆戰死其年惟揚元義
兵盡歸壬寅秋王從朕下潯陽陳友諒敗潰時張士
誠發兵攻長興王畱守潯陽未幾召歸師次中塗令
復守潯陽比至陳兵已入城守王遣兵與戰陳兵復
潰俘斬數千獲其眷屬戰騎彼時潯陽之境空荒棄
而弗守師旋建業癸卯春正月取豫章內變王復討
平張士誠北寇壽春朕親往援王爲前部張兵敗北
旋師金斗周圍其城戰間陳友諒大率兵寇豫章王
罷金斗之圍歸整舟師解豫章之難秋七月師次彭
蠡陳友諒罷圍逆戰王身先諸將敗陳一巨艘死者
千五百人自是彼軍勢弱我軍威震由王身先癸卯

歲畱王守京朕西征武昌下克陳之後其年大會兵於京師乙巳歲命王取淮東淮陰諸州仲夏師旋歲丙午命率甲士二十萬東取吳越鏖戰於吳興皂林之野生擒張兵六萬不戮一卒盡赴京師冬十有一月師抵姑蘇明年丁未秋九月姑蘇下兼浙左之太平詔班師命王西略蒼梧九谿率服還軍京師洪武元年戊申春正月朕卽大位二月命王爲征虜大將軍銀青榮祿大夫上柱國錄軍國重事右丞相太子少傅信國公命率甲士二十五萬北定中原抵齊魯而民安所過輯兵守禦規畫足食兵不民擾所得壯

士帥而徂征不煩朕念北齊旣平命渡河南兵至大梁父老壺漿以迎西下洛陽長驅淆函直抵潼關守者拒戰王命宋國公馮勝拔之朕命拒關而守諭歸大梁比下河內由鄴下趨趙州抵臨清其年八月三日比入胡都捷奏平胡復命西下晉冀如命井陘長驅晉冀以平二年春正月召渡河西兵入關中守者皆棄全有關內之地召歸天下太平三年冬十有一月論功行賞命王爲開國輔運推誠宣力武臣特進光祿大夫左柱國太傅中書右丞相征虜大將軍改封魏國公五年夏五月衆議北入沙漠王至嶺北兵

疵而還勅命沿邊輯守歲鎮於燕口外餘民自是收
盡海內無虞十七年甲子太陰數犯上將朕惡之名
罷北鎮勞于家是年臘月二十有一日染疾朕恐之
星馳四召名醫咸至終疾弗瘳明年乙丑二月二十
七日巳未薨特封中山王謚武寧享年五十有四爰
以是年四月十八日巳酉葬于鍾山之陰生男四人
世子允恭襲封魏國公女四人長女燕王妃王平昔
言簡慮精當提兵之時命出不二諸將敬若神明所
至之處攻城不屠與人不戲凡受命而出及功成而
旋每不自矜至於封姑蘇之府庫置胡公之美人財

寶無所取婦女無所愛忠志無疵昭明平日月旣薨
朕恐歲月幽遐磨迷偉績朕特親筆生前張我武威
偃兵息民混一區夏奠安人神之勞以示子孫耿光
萬世勒諸堅石樹當神道歌曰景命昌今天彰鏘我
英俊兮忠良幽韜秘略兮神機默溫溫兮兼剛秉旄
鉞而征征兮旣出幡幢繚繞兮雄氣軒昂戰騎霧兮
蹄疾旌旌烈烈兮前行六軍濟濟兮甲冑礪予燦爛
兮精鉷舍之兮周廬星列屬橐兮比比懸傷刁斗聲
頻兮令密山川妖魅兮奚藏彎弧力勁兮射欃槍幾
披星月兮秋霜奮忠海內兮孰前當摧撫順兮我武

惟揚

魏國公徐公達

黃金

徐達濠州

今鳳陽縣

永豐鄉人元至正癸巳天下大亂我

太祖集義旅達來麾下年二十二初授鎮撫周旋

二年上視其動靜語默悉超羣英於是位諸將上

凡有徵征皆以代行乙未以身脫上於危難已而

從渡江下采石定太平命為將東取溧水溧陽禽陳

也先於太平丙申二月破蠻子海牙舟師三月從征

入建康命為大將浮江東下取京口一日克其城授

鎮江翼元帥府統軍大元帥未幾轉江南等處行樞

密院同僉將數萬人攻圍毗陵張士誠遣其弟九六

盛兵來援迎擊破之禽九六既而阨於牛塘與常遇

春夾擊敵眾禽其將張德復圍毗陵敵食少戰不力

丁酉三月遂克之陞僉院繼克寧國宣城亦附八月

取馬馱沙戊戌十月克宜興十一月上親征婺州

命守建康己亥四月池州捷聞陞奉國上將軍同知

密院六月上自浙還遣西征皖城既旋自無為登

陸至浮山砦擊敗趙普勝部將胡總管因克潛山庚

子五月陳友諒寇池州設伏敗之斬首萬級生禽三

千餘張士誠兵寇宜興城陷率師復之獲其眾三千

脫上於危

友諒

餘皆戰歿辛丑三月拜江南等處行中書省右丞八月從上征江州陳友諒棄城走武昌乃屯兵漢陽之夏口以遏之回守江州尋召歸次中途令復守江州比至陳兵已入達遣兵與戰陳兵潰俘斬數千獲其眷屬戰騎壬寅下豫章命征武昌豫章內變旋師討平之癸卯三月張士誠北寇壽春從上往援爲前部張兵敗北轉攻廬州將下屬友諒大率兵寇豫章遂罷圍歸整舟師從上討之七月師次彭蠡友諒逆戰達身先諸將敗敵一巨艘歿者千五百人命還守建康自是諸將效勇竟殲友諒由達作其氣甲

辰正月陞左相國二月武昌平遂取廬州江陵常德夷陵衡州等處乙巳十月取淮東泰州丙午三月克高郵四月克淮陰安豐八月總甲士二十萬東取吳越鏖戰於湖州皂林之野生擒張兵六萬不戮一卒盡赴京師十一月師抵姑蘇營于葑門分遣別將軍于婁胥閘諸門又築長圍困之架木塔與中浮屠等築臺三成名曰敵樓下瞰城中設火筒其上一發連中又設襄陽礮著物無不糜碎礮風著人皆死城中震恐明年丁未二月遣人自軍中請事上勞之曰古者帝王之興必有命世之士以爲輔佐成周伐罪

鷹揚奮興炎漢仗義羣策畢舉所以克集大勳肇啓
隆祚者也將軍自昔相從忠義出乎天性然且沈毅
有謀端重有武故能遏絕亂略消弭羣慝建無前之
功雖古豪傑之士不能過也今所請事悉欲稟命而
行此賢臣事君之道吾甚嘉之但所請事多可便宜
行者而識慮周詳不肖造次有違誠社稷之慶邦家
之福然將在外君不御乃古道也自後軍中緩急將
軍從宜行之時姑蘇城堅難猝破無錫莫天祐與士
誠爲聲援其部將楊茂善游水天祐遣爲偵邏卒獲
茂送達達釋而勞之待以腹心於是屢遣茂游水往

計使
宜行
事

平張
士誠
北取
中原

來因獲其彼此所遺書報得士誠天祐虛實知城中
困乏乃親督兵攻破之九月縛士誠送建康得兵二
十五萬論功名見於戟門封信國公賜賚優厚降褒
諭十月命爲征虜大將軍帥諸將北取中原 上諭
諸將曰征伐所以奉天命平禍亂安生民故命將出
師必在得人今諸將非不健鬪然能持重師有紀律
戰勝攻取得爲將之體者莫如大將軍達宜專主中
軍策勵羣帥運籌決勝不可輕動十一月克沂州降
王宣取益都兗東郡縣相繼欵附十二月下濟南所
過輯兵守禦規畫足食兵不民擾洪武元年正月

史記卷之五

上卽帝位加銀青榮祿大夫上柱國錄軍國重事中
書右丞相信國公兼太子少傅誥曰命將出師立興
王之大業建邦啓土資佐運之能臣仗斧鉞而成顯
功秉鈞衡而居右揆才爲異等賞亦非常孚在朝廷
誕宣綸綍某剛姿英傑遠量雄深巖巖山嶽之重矯
矯虎貔之猛從予起兵于濠上先存捧日之心來茲
定鼎于江南遂作擎天之柱氣貫萬人而無敵拔幟
摧城威行四壤而推恩撫民按堵牙旗指顧淮海澄
清雷電鏗轟湖湘率服西連巴蜀東際溟洋有征則
總水陸之兵戎所向則收郡邑之圖籍削平二強國
古之名將何以加辛勤十餘年吾之封疆由此定疊
奏蘇湖之捷俘其臣主而歸允謂元勳宜膺上爵尊
崇相府仍加開國之褒輔導儲宮尤重兼官之選於
戲太公韜略當弘一統之規鄧愈功名特列諸侯之
上用頒寵數尚克欽承二月克樂安三月引兵上黃
河取汴梁守臣李景昌遁父老壺漿以迎四月下洛
陽長驅崑函直抵潼關守者拒戰命馮勝拔之五月
車駕幸汴梁詣行在謁見七月渡河取衛輝彰德廣
平趙州由臨清上德州取長蘆至直沽獲其海舟作
浮橋以濟師又令副將常遇春都督張興祖各率舟

元都

封府 庫圖 籍寶 物故 宮殿

師並河東西以進令步騎遵陸而前元丞相也速等
捍禦海口望風奔走克河西務通州元主及其后妃
太子北走八月庚午進取元都至齊化門命將填濠
登城而入達登齊化門樓執其監國宗室淮王帖木
兒不花及太尉中書左丞相慶童平章迭兒必失朴
賽因不花右丞張康伯御史中丞滿川等戮之并獲
宣鎮南威順諸王子六人及玉印二成宗玉璽一封
其府庫及圖籍寶物又封故宮殿門以兵守之宮人
妃主令其宦侍護視號令士卒無得侵暴人民安堵
市肆不移人謂曹彬下江南伯顏入臨安不是過也

既而順德守將吉右丞胡叅政等皆自西山來降復
獲前樂安逃將俞勝及南叅政等乃遣使赴京獻捷
上大嘉賞是月承 詔置燕山等六衛以守禦北平
九月命將略保定中山河間真定懷慶俱下十一月
達發北平取山西所過擇人守要害及平未附山寨
十二月將圖太原謂諸將曰聞擴廓帖木兒以元主
命率師遠出太原取道保安經居庸關以攻北平孫
都督總六衛之師足以鎮禦我與爾等乘其不備直
抵太原傾其巢穴則彼進不得戰退無所依此兵法
所謂批亢擣虛者也若彼還軍救太原則已為我牽

制進退失利必成禽矣諸將皆曰善遂引兵徑進擴廓帖木兒至保安聞之果還兵其鋒甚銳達遣精銳夜襲其營擴廓聞變倉卒不知所出急踰帳後乘驛馬遯去遂克太原得兵四萬人馬四萬餘匹復遣薛顯傅友德擊賀宗哲等軍於石州而崞忻霍絳猗氏平陽等處皆平二年取鹿臺河中關中進克鳳翔會諸將議師所向諸將咸以張思道之才不如李思齊慶陽易於臨洮欲先幽州取慶陽然後從隴西攻臨洮達曰不然慶陽城險而兵悍未易猝拔臨洮之地西通番夷北界河隍得之其人足以備戰鬪其土產足以供軍儲今以大軍蹙之思齊不西走胡束手就降矣臨洮旣克則旁郡自下諸將然之遂進克隴州秦州至鞏昌降其平章梁子中總帥汪靈真保乃遣右副將軍馮宗異征臨洮李思齊果不戰出降獻銀印等物張良臣聞而懼亦以慶陽降達征平涼良臣復叛達怒趨至涇州諸將咸以師會達命顧時陳德傅友德俞通源率精騎抄其出入之路以絕其聲援復令馮宗異湯和等以兵四面圍其城良臣開門恣人馬馳騁城下達麾兵擊敗之久之良臣志不得逞戰復不利遣人赴寧夏求援皆被獲內外音問不通

漢從沙

糧餉乏絕平章姚暉等知事不濟獻門納師達勒兵入北門良臣投井中引出斬之陝西悉平十二月上大賞定中原諸將以達克敵制勝振揚國威撫綏軍民得大將體賜白金五百兩文幣五十表裏三年復總兵征沙漠大破王保保軍于定西遣將取興元復西平土蕃征哨極于西北始還是冬大封功臣授開國輔運推誠宣力武臣特進光祿大夫左柱國太傅中書右丞相進封魏國公叅軍國事食祿五千石賜誥命鐵券其文曰朕聞自古帝王創業垂統皆賴英傑之臣削羣雄平暴亂然非首將智勇何能統率而成大功如漢唐初興諸大名將是也當時雖得中原四夷未盡賓服以其宣謀效力之將比之豈有過我朝大將軍之功者乎爾達起兵以來爲朕首將十有六年廓清江漢淮楚電掃兩浙席捲中原威聲所振直連塞外其間降王縛將不可勝數頃者詔令班師星馳來赴朕念爾勤勞旣久立功最大今天下已定論功行賞朕無以報爾是用加爾爵祿使爾子孫世世承襲朕本疎愚皆遵前代哲王之典禮茲與爾誓若謀逆不宥其餘若犯死罪爾免二死子免一死以報爾功於戲高而不危所以常守貴也滿而不溢

所以常守富也爾當慎守斯言論及子孫世世爲國
良臣豈不偉歟仍賜文綺及帛一百疋四年賜地若
干頃佃戶若干戶守墳人百五十戶儀仗戶二十家
復賜第京師表其里曰大功坊五年北征還命沿邊
輯守歲鎮於燕口外餘民自是收盡生養休息海內
無虞十七年召還至冬疾作 上遣使馳召名醫視
之及禱于神祇弗瘳明年二月二十七日薨年五十
四 上慟悼罷朝親爲文祭之追封中山王謚武寧
賜葬鍾山之陰 上謂羣臣曰朕起自徒步大將軍
爲朕股肱心膂戮力行陣東征西討削平羣醜克濟

大勲今邊胡未殄朕方倚任爲萬里長城之寄而太
陰屢犯上將不意遽殞其命天何奪吾將之速朕夜
來竟夕不寐欷歔流涕思盡心國家爲社稷之重安
得復有斯人乃欲有以報之無所用其情耳但著其
勲烈宣于金石永垂不朽使後世知斯人爲國之元
勲也遂親製神道碑旣備其功又稱其平昔言簡慮
精常提兵之時令出不二諸將敬若神明所至攻城
不屠與人不戲凡受命而出及功成而旋每不自矜
至於封姑蘇之府庫置胡宮之美人財寶無所取婦
女無所愛忠志無庇昭明乎日月復命配享 太廟

塑像祭于功臣廟位皆第一其上三世皆封王爵王夫人子男四人皆上所賜名輝祖襲魏國公添福勲衛增壽左都督膺緒僉中軍都督事女四人長仁孝皇后次代王妃次安王妃孫茂先周府儀賓景昌定國公欽襲魏國公開國功臣錄封公後復佩大將軍印填北平以便宜徙山後順寧等處軍民戶三萬五千八百口一十九萬七千餘籍爲軍者給月廩爲民者給田以耕凡置屯二百五十四定墾田一千三百四十三頃北平軍府之用皆賴之

上嘗從容謂徐兄功大未有寧止欲以吾吳時舊邸居若達固謝不敢一日強沃以酒旣醉覆以被舁卧邸正寢達醒大驚俯伏堦下呼歿罪不已上益悅命有司爲治甲第表其坊大功曰令世世無忘爾功胡惟庸爲左丞相儉而貪以達元勲貴重欲內好達惡之反賂達闇者福壽使爲間以圖達福壽發之達亦不問惟時時爲上言惟庸不可過委過委必敗後惟庸反帝以是益重達李氏續藏書

魏國公徐輝祖傳

王世貞

公徐氏諱輝祖初名允恭鳳陽人父曰中山武寧王

達首佐 高皇帝定天下出入將相勛德爲諸功臣
冠配饗 廟廷始娶張夫人以不宜室卒 上爲特
繼謝夫人首舉公公生而白皙秀眉豐下及長長八
尺五寸顧盼有神舉止儼雅中山王數填北平畱公
宿衛御家家衆肅然 上故心器之命理左軍都督
府月廩祿二十石未幾而中山王自北平還疽發於
背有間 上命公奉 手詔道迎勞俄而王薨又三
年而爲洪武己巳始命公襲爵魏國公賜誥稱揚中
山王之烈而勉公忠以立志禮以守身恪盡繼承之
道尋以皇太孫允炆嫌名改今諱明年賜公與諸公
各黃金三百兩白金二千兩鈔三千錠文綺三十疋
綾十疋俾還鳳陽賜第以歲時入覲尋給兵百二十
人爲衛復賜鈔四百錠明年出陝西防邊自是歲出
練山東河南卒 詔公仍于太倉支歲所受祿五千
石而還公田於官時故元降將阿魯帖木兒乃兒不
花與其部衆隸 燕王軍中有異志爲告者所發
上密詔王詢實而命公以詔往公之姊王妃也於是
悉得其實與王合筴併其黨與悉捕送 闕下戮之
二十九年國子學正吳啓言國子師生日夥不爲甄
別高下無以懲勸 上命公帥禮部翰林院臣詣監

試其文秭分別送吏部銓用公勛臣也 上知公有
文故特寄之人以爲榮 高皇帝崩 皇太孫卽位
時諸宿將且盡公與李曹公俱以肺腑領朝班曹公
加太子太師公加太子太傅 文皇帝爲燕王時入
臨稱疾不拜王屬尊而功高有武略擁強兵 朝議
憚之會王歸而畱次子高陽王待命於邸欲藉公爲
耳目公謝絕之高陽王微聞諸大臣謀有所不利於
燕王卽夜竊公善馬歸燕公大驚晨白之于 上亾
何燕師起以誅君側爲名諸侯徹兵往攻之相繼敗
始議置大將公與曹公皆當往時曹公有公卿間聲

而公終以燕戚屬故見左然公一意扞圉時曹公與
歷城侯相繼敗燕師日迫矣其世子高陽王皆陰餌
公爲內應公確然不撓乃改餌公叔弟及師攻金川
門公猶與常開公昇等分道出大戰皆不利京師悉
爲燕公獨守先王祠不從勸進于是錮之私第尋逮
下獄久之公竟不屈以歿時僅四十餘王姊爲 仁
孝皇后竟晏駕不敢爲公請久之 上追思后不已
且念中山王功大召公子欽予故公封還其舊所削
祿及廬產蓋百八十年而 今上皇帝詔悉錄爲建
文君歿事者各以官稱廟祀之金陵而公居首

詔錄
建文
歿事
者

外史氏曰當 文皇之起兵而徐公其妃弟也毋論成敗之猶匿而公矢節故主卽革命之際小一移志爲曹公所爲業以元舅居上公備心肺疇能易之公舍而恬然趣歿一何決也於建文爲純臣於中山王爲令子矣文皇以死全公之志而弗奪其爵以報中山王今 天子又能光大顯融之先聖後聖其一揆哉雖然亦可以覩天道焉

定國公徐增壽

增壽中山武寧王第三子母謝氏生而眉宇秀朗少嘗侍父入見 太祖高皇帝奇其機警賜名增壽長

而勇敢善騎射選爲勳衛帶刀侍從謹實寡過陞右軍都督府左都督嘗奉命從 上征胡寇乃兒不花與有勞績雖生長貴盛而所居一室左右圖書公退延賢士其中講論古今成敗得失之迹疊疊忘倦上之舉義增壽最效勤誠有發其事於朝遂囚之上入金川門建文君將自焚命梓至殺之右順門廡下 上追悼之首袞贈爲武陽侯賜諡忠愍勅有司治喪具祔葬其父中山武寧王墓次尋贈欽承父業推誠守正武臣特進榮祿大夫右柱國加封定國公命其子景昌襲爵

定國公徐景昌

楊士奇

中山王四子長輝祖襲爵魏國公次增壽當 太宗皇帝靖難之際有翼戴功而竟歿非命初追封武陽侯進定國公謚忠愍公其嫡嗣也時年十五召見賜名景昌遂命襲爵定國公授欽承祖業推誠奉義武臣特進榮祿大夫右柱國食祿二千五百石子孫世襲命吏部慎簡名儒道之學問公天資英敏已嶷嶷負智識從師講授日謹其師豐城丁秀恒重厚雅則公惟其教之率未嘗或違而寒暑朝夕所以事師禮咸備踰年始趣朝參 上察其進退恭謹喜遂欲任

以事永樂四年命掌左軍都督府雖細務必親而智日廣明汴河溢命公代祀河患以寧十三年車駕幸北京以公事入見顧問再三進對稱旨賜御廐馬三疋鈔六萬緡十七年修鳳陽皇陵宮殿命公董之益竭祗勤撫綏獎勵人競勸功十八年侍 仁宗皇帝入朝洪熙元年命掌行在後軍都督府是年丁母太夫人沐氏憂宣德初起復高煦構逆 宣宗皇帝下詔親征命公等守北京師還 賚良厚後車駕三出巡邊公皆扈從祀嶽瀆及冊封宗室皆秉虔將命先是 仁宗皇帝篤念外家孜孜勉公兄弟子姪於學

公祇體德意克力進修朝退閉門手不釋卷遂多識
古人言行之善與凡治亂興衰之由間暇吟咏自適
家居事親孝爲人簡靜寡所交處惟名儒賢士過之
必起趨迓相與傾寫極歡未嘗苟附權貴享年五十
計聞 上命賜祭賜賻勅有司治葬葬宛平縣京西
鄉黃家臺之原配張氏封定國夫人子男二長顯忠
次顯義

黔國公沐英傳

沐英字文英定遠人父諱超母顧氏英八歲而孤屬
元末大亂母携之逃難又故時 太祖高皇帝龍飛
濠梁英往依之惻然撫之爲子則以國姓年十八爲
帳前都尉甲辰遷廣武衛指揮使尋加昭勇大將軍
改廣信衛勤於軍政高城利兵以俟攻取士卒有蹂
踐民田禾者必加重譴百姓安之洪武元年二月從
天軍下崇安剪陳友定拔溪寨破漳泉等州遂定閩
中三月命復姓仍調守建寧節制邵武延平汀州三
衛三年授鎮國將軍僉大都督府事四年陞本府同

知進階榮祿大夫署掌府事時開創之初四方文移甚劇英剖決如流九年巡勞關陝以西疾苦事多所便宜十年副衛國公鄧愈征西戎直抵崑崙山值霖雨浹旬餽運弗繼英與士卒同甘苦病者醫治之士皆感悅効死大戰關地數千里遂進封西平侯賜號開國輔運推誠宣力武臣階仍榮祿大夫勲柱國食祿二千五百石授以鐵券俾子孫世襲十一年拜征西將軍將京師及河南陝西山西兵復征西蕃降其衆二萬俘馬牛羊二十餘萬得納降七站之地擒其酋長曰三副使曰瘦滕子者獻于京威震西土十三

年春元孽脫火赤國公愛足知院爲邊患英將陝西兵略亦集乃西路渡黃河經寧夏歷賀蘭山涉流沙至其境分軍爲四一襲其背二掩其左右英自率帳前驍勇當其前夜銜枚以進合兵攻之俘其全部以歸十四年大將軍魏國公徐達北征英副之將一軍由嵩高企寧過驢駒河獲知院李宣尋上以元遺孽梁王栢匝刺瓦爾密恃雲南險遠戕虐使臣以英副潁國公傅友德率師三十萬征之遂繇辰沅遵陸路出羅鬼攻普定普安循格孤山之南出奇兵襲畢節擊可渡河皆下之梁王遣其司徒達里麻駐兵曲靖

拒守英謀於友德曰雲南兵屯曲靖必意我軍深入
疲勞且以程計之謂未能猝到彼必懈惰我若兼程
以進出其不意掩其不備此批亢擣虛之術也曲靖
一破餘可傳檄而定友德然之遂乘大霧進至白石
江阻水而止霧斂則已薄其營矣江闊僅一里許其
淺處可涉也衆咸欲與戰英視其陣曰我軍遠來形
勢旣露固利於速戰然亟濟則所傷必多宜多方以
諗之乃整衆鳴鼓若將濟者彼悉擁精銳拒於水上
英別遣一軍泝流暗渡循山而出其陣後吹銅角以
張聲勢仍于山林岩谷間樹旗幟爲疑達里麻驚懼
急撤陣後軍以禦之水上軍覺之心動而陣亂英於
是拔刀蹙兵以濟士有猛而善泅者數百人皆蒙盾
而渡以長刀仰斫岸上軍却我軍得登者人百其勇
彼軍退數里結陣而待我軍畢濟旣就列旌旗烜燿
鎧仗鮮明彼軍奪氣友德麾兵進戰火炮交發鼓譟
之聲震動天地接戰數合猶未分勝負英察其氣已
衰縱鐵騎直擣其中堅連斬數百人出入其陣彼衆
披靡遂敗之生擒達里麻俘甲士二萬馬萬匹死者
不可勝計橫尸十餘里梁王聞敗走死滇池島中英
乃駐兵金馬山父老焚香迎拜入城禁士卒毋擄掠

收梁王金寶并官府符籍雲南平果如所計遂分兵
下烏撒得七星關以通于畢節十五年春正月分遣
將士略建昌潑江臨安沅江尋甸楚雄洱海等處獨
大理酋段世據南詔皮羅閣故城不服英命常茂從
間道繞點蒼山後攀崖緣木而上據其巔樹旂幟以
亂之英乃斬關而入遂拔其城擒世調勝兵取鶴慶
掠麗江下金齒收三營砦破石門關軍威大振由是
摩步和泥車里平緬相率來附雲南大定奏分烏撒
烏蒙東川芒部建昌會川羅鬼普定普安水西畢節
隸四川自是雲南列爲郡邑凡府州縣宣慰司長官
司一百八籍其戶七萬四千六百餘分設軍衛犬牙
相制以守其地夏四月回軍與友德會于滇池之上
時烏撒東川建昌皆有變志友德曰蠻夷叵測若不
乘我兵力以定之終于叛亂英深然之遂相與合兵
皆攻下之并克芒部斬首三萬級所獲牛馬羊數萬
餘立烏撒畢節二衛以鎮之師回秋九月雲南諸部
復率衆攻城都督馮誠固守設樓櫓強弓于埤賊近
輒射之稍怠則出勁兵以擊之英聞變兼程還曲靖
遣健步懷羽檄走報城中約爲內應爲賊所得健步
曰總兵官領大軍至矣賊散走安寧羅次邵甸富民

晉寧大棋江州等處據險自保英分兵勦除之斬首
六萬級生禽四千人雲南復平畱英鎮守十七年廣
南特作耗英親入其地按兵不進諭以天道禍
福遂降二十年春浪穹逋寇扇羣蠻爲亂鶴慶劍
川相應英調大理衛指揮鄭祥乘其未集掩而殲之
二十一年春正月百夷屯摩沙勒犯邊調都指揮甯
正領兵擊破之斬首千五百級三月復悉衆號三十
萬戰象百餘寇定邊以報摩沙勒之役親率兵二萬
抵賊營與之對壘出輕騎三百挑之賊以萬人象二
十迎戰鋒始交獲一象殺賊百餘人而還於是軍氣

計破
象陣

益壯咸曰賊易殺也英乃名諸將校謂之曰定邊受
圍已久若不卽破賊設定邊失守則賊勢益張彼徒
恃其象以恐懾我軍今方少以騎士挑之已獲一象
又何足畏乎吾知所以破之之術矣可多置火銃神
箭於前作三行參差而陣伺彼象近則前行之銃箭
齊發象若未退則第二行者繼之第三行又繼之使
銃聲不絕象必驚而却走然後以大軍乘之破之必
矣明旦分軍爲三隊都督馮誠領之甯正領其左都
指揮同知湯昭領其右乃下令曰主上平日恩養將
士正欲效膚寸之力於戰陣之間爾今日之事有功

者賞退衄者戮全隊三令而五申之將士鼓勇爭進則悉衆出營盜驅戰象結陳以待英駐馬於高岡以觀左隊小却英望之怒遽遣使馳取左隊將之頭左隊遙見使者橫刀飛馬而來復擁士卒大呼突入其陣無不一當百大戰破之斬首三萬餘級俘萬人象中矢灰者過半生獲四十有七殺其酋餘黨盡殪百夷酋長思倫發聞之遣人奉方物犀象來降願輸貢賦英爲之請於朝許之遂定其地秋八月東川蠻據烏路山結砦而叛其地重關疊巘縣崖峭壁上下三百餘里人跡阻絕調甯正帥雲南兵會京軍犄角討而降之冬十月廣西阿赤部酋長者滿矣情緒越州土酋阿資叛英自將直擣阿赤部者滿矣情皆服誅俘男女五千餘口牛馬如之阿資降二十二年春二月阿資復叛再調甯正討之殺火頭弄宗等五十人冬十月入覲上宴勞賜黃金二百兩銀五千兩鈔二萬五千貫文采百純別賜鈔五萬貫使建第于鄉居十日而還英初如京雲南之民無老幼惟恐其不來也咸戚然東向望者累月及聞還各相率遠迓數百里之外二十三年秋九月臨安教化三部不供租賦調本衛指揮王執討平之冬十月普安酋密

卽作亂調貴州都指揮張泰討之俘獲二千餘衆獲馬牛數千得糧四萬斛二十四年春正月順寧蒲蠻猛吾馬忒爭襲傷及官軍調都指揮俞輔往問其罪夏四月阿資又叛英集諸將佐議曰雲南地方數千里伏天朝威武金齒百夷車里平緬摩步和泥及諸種羅羅蠻獠悉以降伏惟阿資恃險累叛若不復其巢穴雖曰彈丸黑志終爲梗化於是簡士卒親入至補衝賊衆迎敵英麾兵擊之殺獲殆盡阿資僅以身免遣其子請降秋七月英以八百媳婦弗率命遣使招之其酋長刀木板懼遣招剛關都奉方物貢于

朝而歸附焉二十五年五月十七日得未疾卒年四十七訃聞上哭之慟輟朝遣官致祭其詞有曰使我無西南之憂者英之功也命長子春迎喪官軍護至京師上遣中使祭臨追封黔寧王謚昭靖配享廟庭賜葬江寧縣觀音山之原英爲人寡言笑沈毅有智量好賢禮士撫御卒伍尤有恩意所至未嘗濫殺旣鎮雲南乃築城垣設衛禦簡官僚修惠政剔奸蠹撫酋豪興學校飾館傳嚴祠祭治水利立屯田謹斥埃墾田一百一萬二千畝辨方物以定其貢稅視民數以均其力役疎節目以寧便其人嘗從容詢

一儒生曰吾亦欲觀書何者爲要對曰儒者之學必自小學四書始以至五經諸史莫不欲遍通今公爲國重臣春秋鼎盛但當究輔弼之大義以安天下爲已任豈欲效書生博學強記之習哉惟大學衍義一書乃宋儒西山真先生所撰其格致誠正脩齊治平之道與夫天人相感治亂之所由皆具此書公必欲觀書請觀此書則大人之事備矣遂欣然令左右售而得之退朝之暇卽延縉紳講解切磋嗟間之以通鑑綱目不三二年學問大進論事輟援引典故其在雲南于鈴閣之素壁間命善書者大書周子太極圖說

張子東西二銘朱子敬齋箴孔明出師二表李密陳情表韓愈佛骨表朝夕瞻對求其理趣又擇民間之俊秀及土官之子弟皆令入學肄業使知禮義曰首善之地風化攸出不可後也間於朔望釋菜畢延師生坐於堂設廣席坐諸生於庭烹羔羊以食之士官子弟於冬夏製時衣以衣之嘗得大極圖善本并白鹿洞規善之刻石置文廟平居無所嗜惟有馬癖嘗語人曰天用莫如龍地用莫如馬支遁一僧爾猶愛其神駿而畜之吾將也馳逐於兩陣之間順吾驅策與吾一心以立功者在良驥耳是不可愛而他愛乎

蕃息甚富其良者以充歲貢餘遇有征討分給將校將之勇敢善戰者所得多至十餘匹然未嘗售於人以規利後雲南父老與蠻夷土官願卽府城立廟合辭以聞 上報可及追王三代妻馮繼耿俱追封黔寧王夫人子男五春晟昂杲昕

西平惠襄公沐春行狀

唐愚士

公諱春字景泰世爲鳳陽定遠人考黔寧昭靖王幼失怙恃當元末大亂甫八歲會 太祖高皇帝龍飛濠梁見而憐之命 孝慈皇后育以爲子迨長總兵四征咸著勲烈命復故姓頒賜鐵券號開國輔運推

誠宣力武臣階榮祿大夫勲柱國官大都督府同知爵西平侯食祿二千五百石子孫世襲及薨乃追封而賜謚焉公則王之冢嗣也生未朞造母夫人喪鞠于外祖氏長歸就學洪武己未始十有七歲卽侍王考征西蕃洮州擒元三副使明年從征亦集乃擒國公脫火赤等歸又明年從征雲南歷功先士卒十六年還京師遂掌禁旅冬江西寇僭號順天王煽諸郡作亂公與征焉獨冒矢石奮勇先登殲之明年師還初天兵旣平雲南畱王鎮守機務之密者非他人所能道凡有遣輒命公一歲之內馳驛再三所報悉稱

有十八年秋授驃騎將軍僉後軍都督府事廷臣請
試職 上曰是兒我家人非他比也畀實授後軍轄
幅員之北視他府爲劇公割決如流事無壅滯是年
冬繫天下重罪於烈山公錄而詢之奏釋數百人十
九年蔚州民告變邢海等構逆 上命公馳驛往至
則巡城厲士襲而捕之推校得實白其誣枉 上悉
恩宥又全活數百人二十年春從征虜大將軍宋國
公帥師三十萬北出沙漠剿元之餘孽未庭者次金
山降其署丞相開元王納哈出俾朝京師公爲護送
納哈出與其屬見其威嚴甚敬憚之二十五年六月

王薨於雲南公往奔喪十月奉柩還葬哀毀盡禮尋
有詔起公襲爵繼任誥曰曩命爾父副征雲南留鎮
其地能布恩德蠻夷率服朕無西南之憂者十有一
年今命爾襲父之爵當思爾父相逢之幸忠誠爲國
夢寐存心則鬼神有鑒福祿永昌矣及命雲南各衛
軍馬悉聽節制一切事務應奏者必經由然後來聞
陛辭奏曰臣父鎮滇畜馬駒以勞戰士藏寵錫以賚
遠夷請以其羸歸數有司 上弗之許仍厚其賜以
遣至鎮則宣 上德意發號令修戎撫民柔遠懷邇
無改于父之道又謂食爲兵天屯政實第一事較多

寡之入嚴賞罰之例稽功乃倍餉饋以足二十六年
春緬國酋南速刺來朝貢于京和泥祿谷爲邊患遣
元江刀平控禦之羅雄法束嘯聚命都督何福討降
之東川酋弗靖奏復攝賽爲知府境遂寧謐秋維摩
阿的等一十砦構王弄山撒哈諸酋拒命調都督瞿
能平其地俘一千一十九斬六百五十四級獲馬五
十二牛羊四千有奇皆給戰士遂讐服不敢携二十
七年春越雋賈哈刺連西蕃疊邊出沒北勝浪渠州
公潛遣百戶蘭宗賢輕騎而往集民兵伏其要覆之
擒斬二百四十三請立瀾滄衛以填其地緬復獻方
物秋施甸蒲阿董等衆犯永昌境公命指揮使胡淵
乘間出奇襲殺賊三百三十二獲馬七十二衆遂披
靡先是越州蠻龍海子阿資據龍窩縱殺掠累爲民
害 朝廷命諸將率兵數萬征之師無功自後無敢
議伐者得肆猖獗公復討之衆以爲難進兵紫溪山
擒其黨者宗乃謀曰歷年不獲此寇者彼恃其地多
險阻及各處土酋皆姻婭得亾匿今調土酋悉從征
設謀羈絆俾不能通復多置營堡相犄角制其出入
授首必矣乃分駐陳寧逼之二十八年正月六日兵
至赤窩果獲阿資屍諸市及誅同惡沙陀普也等二

百四十一人越州平阿資素爲桀黠至是捷聞上
嘉獎之衆亦嘆服冬廣南酋儂真佑阻兵負固公調
都指揮王俊征之盡殪其衆凡俘斬二千一百七十
馬牛四百八十八穀二萬一千六百四十石廣南通
明年順寧酋猛丘結外夷雲龍酋段羌納逋逃皆蓄
異志公遣大理衛指揮使鄭祥往討猛丘懼而斃羌
伏誅改立猛朋段海食其地寧遠州右爲七十城門
壤交阯恃險遠肆強獷公命何福率兵一戰蠻臺江
擒殺男婦二千四百五十盡獲其乘象軍實酋刀拜
爛始懼乞降奏復其官麓川宣慰思倫發先酌于酒
其下多怨三十年春刀于孟弄兵謀逐其主以自立
思倫發窮奔告援公與之入朝面受宸筭以歸三
十二年二月永寧卜八如加復通賈哈刺寇邊調何
福擒之戮其脇從二十三俘獲男婦三百餘餘黨悉
潰三月公以思倫發之告駐師怒江諭刀于孟釋兵
不聽四月乃戒何福瞿能率勁卒八千嘶校倍道直
擣刀名孟砦渠魁乘象突出追射殺之遂奮兵縱擊
大破其衆四萬餘斬三千六百餘級獲象四十馬一
百五十回擊景罕空蓬二砦皆下之時黨衆七萬裨
將請屠以逞公曰殺降不武乃止誅其尤餘盡釋之

不殺

捷聞大廷以征虜前將軍印授公命總四川貴州雲南各道兵欲盡平其地時公得疾已三四寒暑嘗竭誠殫思氣血愈耗及聞太祖昇遐哀痛甚疾革然未嘗告憊有問者則曰邇稍間也將以秋復征而遂不起矣九月十二日甲申夜半長星自東墜西其聲如雷衆咸見聞公隨薨享年三十有六訃聞 賜祭葬諭惠襄公在鎮七載增闢田以畝計三十萬五千九百八十四益糧餉以石計四十三萬五千八百有奇復民戶五千七百五十口五萬二千四百二十四又嘗鑿鐵池河三十六里灌宜良涸田數萬畝民受其利

初王之薨父老爲立廟請諸 朝報可將鳩工適公至曰元咸陽王功德崇懋廟廢不治當先之乃新其祠宇議者謂公不私其親夷人嗜異端有得胡神肖像於舊井者訛言沸騰有神異傾城駭觀至萬人公立命焚之通衢識者知公不惑於怪譎唐有武臣曰李晟提孤軍抗羣賊身佩安危而氣不少衰爵封西平圖像凌煙其子涼公愬亦克以偏師破蔡復唐土宇君子以其父善教其子善繼稱之方之今黔寧王父子之功德勞烈未知其孰優而孰劣必有能辨之者

黔國公贈定遠王謚忠敬沐晟神道碑

楊士奇

正統四年三月十八日黔國沐公薨於雲南之楚雄
訃聞 上悼念輟視朝加隆卹典追封定遠王謚忠
敬其子護喪歸南京葬江寧縣長寧北鄉觀音山先
塋之次沐氏鳳陽定遠人王之高祖考曾祖考祖考
以昭靖貴皆追封黔寧王高祖妣曾祖妣祖妣妣
皆追封黔寧王夫人昭靖四子伯諱春襲封西平侯
歿謚惠襄仲卽王叔昂右軍都督府同知季昕駙馬
都尉王諱晟字景茂自少氣宇閎厚端慤凝重聰悟

過人而博學遠識恭慎寡言喜愠不形於色 高皇

帝重之旣授後軍都督府僉事夙夜祗勤陞授特進
榮祿大夫左都督惠襄繼昭靖鎮雲南薨王嗣封西
平侯仍奉命鎮雲南王承父兄之後秉誠殫慮益弘
遠圖威服德懷恪勵夙夜先是麓川不靖諸蠻遂宣
慰使而分據其地王適至奏發兵平之復奏以其地
置孟養木邦孟定三府鎮沅威遠二州于厓潞江灣
甸大侯者樂五長官司而歲徵其貢賦又於潞江之
西置騰衝千戶所以控制之夷遂帖息 太宗皇帝
臨御之二三年八百蠻酋侵邊王遣將先率兵討之躬

率兵繼之後及蒙自縣蠻聞王來遂遁進擒其酋誅
之事聞賜璽書白金勞王四年安南叛命征夷將軍
率兵及湖廣等都司兵討罪命王佩征夷副將軍印
充左副將軍率雲南等都司兵分道進討王率兵由
蒙自經野蒲斬木通道以入先遣偏裨攻集猛烈棚
華關隘賊徒悉遁遂築堡駐兵造舟分遣諸將出宣
光江口奪澳沕寺沙昇舟夜出洮水陣師遂遣將引
兵泝流攻賊之富良江自旦鏖戰抵暮賊引却翼旦
諸將咸欲奮擊王曰受命弔伐所欲得兇渠數人而
已縱殺非 皇上好生之心乃止遂造浮梁渡師時

征夷將軍大兵至乃合攻寇之多邦城柵繼擣其東
西二都及盤灘困枚櫓江仙侶等寇悉破之寇首黎
季犁父子狼狽棄其衆獨挈家屬及左右心腹遠遁
於海王合征夷將軍兵追至日南州奇羅海口禽俘
無遺械送京師凡得郡四十八縣百八十六戶三百
十二萬五千九百獲象馬牛畜軍資器仗無筭安南
平六年春班師入朝賜號顯忠輔運推誠宣力武臣
特進榮祿大夫右柱國封黔國公食祿二千石賜誥
券玉帶金幣命子孫世襲既大宴 上親製詩褒嘉
又日賜宴于便殿還鎮雲南是冬安南餘寇携二命

王佩征夷將軍印總兵討之王師壓境寇遁入乂安海島追至占城之境禽寇首陳季擴阮師鄧容等送京師誅之師還仍鎮雲南十七年富州蠻酋積逋賦不入 朝廷命王發雲南貴州兵討之蠻據險以抗王遣兵斷其後諸將請急攻王曰威服不若德服遂使人諭以禍福蠻卽遣子詣京師謝罪悉償所逋

仁宗皇帝嗣位重王勲德老成詔兼太傅名至恩禮加厚遂命佩征南將軍印還鎮 宣宗皇帝初嗣位遣使齎璽書金幣勞之 皇上嗣位恩禮視宣德之

初明年改元正統賜金幣加厚是年冬四川會川黎溪蠻合底泊等爲亂奏遣弟都督昂討平之二年冬馬龍他郎甸蠻不靖復奏遣昂平之三年麓川思任發擾邊侵掠騰衝南甸遣人諭之不下奏躬率兵討之兵至潞江王勉諸將曰出兵尚謀不專恃勇且逼瘴月非用武之時今官軍已集如賊能畏威悔過摠誠謝罪請命赦之斯亦可也遂復遣人諭之不下乃命弟昂及都督方政等率兵前進王尤戒其慎重時王整兵在後政等夜渡江破賊柵賊衆奔北官軍乘勢追至景罕等寨斬首三千餘級象三十餘政奮勇獨進賊伏兵四發政力戰死之時春已半王慮瘴發

非官軍利遂旋師將駐金齒會有旨命王還鎮王至
楚雄疾遂夢方疾革時顧弟昂曰吾父子兄弟受國
家罔極之恩吾不能報矣吾弟勉之吾一家子子孫
孫世堅忠誠保臣節無忝君親又顧昂曰斯役也雖
偏將失利固吾總帥之過此賊不可不貸汝勉之勉
之言訖而逝歸櫬所過道路城郭無貴賤大小迂拜
哀慟蓋王在鎮久惠愛之被於下者深也配程氏追
封定遠王夫人子男一儼襲封黔國公

襲封黔國公謚榮康沐公斌神道碑

吳節

公諱斌字文輝初名儼字可觀世爲鳳陽定遠人祖
考黔寧昭靖王諱英伯考西平惠襄侯春考定遠忠
敬王諱晟叔考定邊武襄伯諱昂歷世以勲閥總握
兵符鎮守滇南公爲人謙恭純篤寬厚慈祥日讀論
孟子史兵家韜略諸書手不釋卷待人未嘗一毫驕
矜形於言貌忠敬王鎮滇四十餘年公侍祖妣太夫
人耿氏妣夫人程氏居金陵調適溫清曲盡孝道暨
奉祭祀接賓客睦內治外咸合其宜人無間言正統
戊午麓賊叛逆上命忠敬舉兵伐之明年己未班
師邁疾薨於楚道公聞訃痛哭幾絕匍匐赴滇奉喪

歸葬庚申春三月入覲詔襲公爵居京師侍從凡五年方忠敬之薨也 朝廷以西南夷獠素服沐氏恩信命公叔父武襄總兵往鎮乙丑武襄薨遂命公掛征南將軍印總兵繼撫其地 陛辭賜今名且勅之曰爾出勲閥夙諳禮教宜撫恤軍民宣布恩信懷服遠人務使盜息民安近悅遠服斯稱重託馳驛至滇適緬甸執麓賊思任發欲送京師復後其子思機發窺覘邀截公於是會同鎮守太監蕭保參贊侍郎楊寧參將冉保毛福壽提軍沿途接取公議宜先都指揮李昇進兵孟璉以促之緬甸宣慰卜刺浪懼斬賊

首并妻孥來獻

上悅遣主事何瞻賜寶鈔彩段以

勞其功丁卯思機發復據孟養爲患勅公同鎮守監丞郝寧都督方英參贊侍郎侯璉統軍往騰衝包砌城垣以撫以捕時春氣瘴發班師還鎮戊辰 上慮賊子負固不廷延蔓無辜欲草薙而禽獮之命兵部尚書肅遠伯王驥平蠻將軍宮聚總諸道兵討之勅公往金齒騰衝南甸干崖等處操練土軍督運糧餉遙振軍威九月公同侍郎焦宏自騰衝一路列諸營堡魚貫而進直抵貫屯金沙江轉輸接濟大軍時王師深入孟養思機發潛遁公嚴督軍士固守橋梁未

幾諸軍畢集攻沒寨柵禽馘賊黨班師而歸以公爲
之後拒也次年己巳回鎮秋八月貴州苗民私結黨
圍城邑焚燒屯堡所過殘戮驛報相承公與藩
臬重臣謀曰貴州乃吾滇南喉襟之地今若待命發
兵邊境赤子恐無噍類矣廼遴委都指揮劉玉率輕
騎倍日兼程往救之賊聞之勢遂披靡由是晉定普
安諸衛賴以安全未幾水西諸蠻攻圍畢節等衛告
援甚急公遣人馳入賊所諭以禍福遂解圍而遁議
者謂非公威信以攝之則迤西城守將不支矣景泰
改元今 上嗣登大寶遣行人黃裳奉勅褒嘉曰爾
疾薨年五十有四

黔國公贈特進光祿大夫右柱國太師諡武僖
沐琮墓誌銘
倪岳

弘治丙辰九月七日鎮守雲南總兵官征南將軍太
子太傅黔國沐公以疾卒于鎮是夜有大星自東北
墜于西光芒亘天人皆見之殆非偶然也公無子既
卒合鎮文武軍耆之屬相向而哭者皆失聲已乃相
相告曰雲南非沐氏不能守遂合辭請以故右叅將

錦衣衛都指揮誠之子崑爲公後鎮巡重臣具以公
訃及合羣情以聞 上震悼輟視朝一日贈特進光
祿大夫右柱國太師賜諡武僖命禮部諭祭者十六
東宮諸王皆賜以祭綸驛歸其喪工部營墳以葬復
以雲南重鎮遂從所請命崑就鎮嗣封黔國公爵充
總兵官佩征南將軍印繼守其地嗣公旣受命始獲
遣官奉公之喪歸葬南京江寧之祖塋公諱琮字廷
芳姓沐氏別號益菴又號東山居士其先鳳陽定遠
人曾大父英開國輔運推誠宣力武臣特進榮祿大
夫柱國西平侯追封黔寧王諡昭靖大父晟顯忠輔
運推誠宣力武臣特進榮祿大夫右柱國太傅追封
定遠王諡忠敬父斌總兵官黔國公諡榮康母梅氏
贈黔國太夫人公生之日百鳥翔集人以爲異未晬
失怙從兄璘號繼軒有文武才由都指揮陞右都督
充總兵官佩征南將軍印繼鎮雲南撫公友愛篤至
四五歲時嘗抱置膝上教以詩書八歲就學不數月
卽能了涉孝經論語小學諸書大義善屬對應答如
響未幾璘卒 朝廷以公尚幼復命璘弟瓚嗣兄職
爲都督同知繼鎮雲南仍授公冠帶食祿之半以俟
公日與縉紳士夫遊揖讓進退有老成風嗜學不怠

詞翰兼美人咸器之成化乙酉入朝嗣黔國爵 憲
廟寵眷有加丙戌春奉勅河南主行鄭靖王喪禮有
白金文綺之賜丁亥三月命還鎮雲南如祖宗故事
勅旨諄切錫賚優渥仍俾兄贊協同贊理公沈毅有
爲不妄言笑勤於爲政公退不入私室冠帶終日寒
暑無間精究簿書事無壅滯凡白事者雖僕隸走卒
亦引見於庭上下之情無復壅遏每遇修貢或拜進
表文必焚香遣使不遑寧處 聖壽歲節行禮敬肅
如在 上前朔望謁孔子廟退坐明倫堂使諸生執
經進講誘掖獎勸無所不至作與學校完飭禮器給
學田展解額設宴禮以興起後進惠養鰥寡驅除貪
暴物害旣去人隱畢宣嘗奉勅督理軍儲留意屯田
修治水利慎簡羣僚分任其事不數年間田無惰農
庾有餘積矣或雨暘愆期有禱輒應民謳歌之農暇
修邊壘飭驛傳因時訓練振揚威武道路險要之處
增建哨堡置兵守之是以盜賊消弭疆圉晏然每邊
夷執贄來見一無所受賞以酒肉幣帛諭以 朝廷
恩威而遣之威德遠被諸夷敬服甲午安南國王遣
陪臣何瑄至邊以假道爲名窺覘虛實公逆知其情
拒不許詐不得騁則侵老撾以啓釁公具以聞請

勅切責復命各夷酋長整棚軍馬慎固封守以防不
虞交人知我有備不敢肆侮遣使詣 闕謝罪云戊
戌尋甸府土官知府安晟卒弟倘謀殺其子瑄欲爭
襲兄職公遣官兵擒倘以聞明正典刑廣西府土官
知府昂貴殘暴虐民抗拒官司其千百夫長龍判龍
各逞夷情動輒讐殺委官審勘擒捕及昂貴歿遺子
不許承襲二府皆奏請革去土官銓流守以治之開
設學校教之禮義百姓安焉其馬隆川順寧
羅雄等處蠻夷弗率皆量遣官軍以定既而臨
安府石屏州昌明里強賊番撒聚衆搶虜附近村寨
勢漸猖獗命三司都指揮吳瑤等調漢土官軍及民
兵往征之格殺番撒斬賊首級百餘殘孽潰散民免
于擾巳亥鐵箐赤石崖等處羅羅尅習嘯聚山林流
劫大理等府公奏調楚雄等府衛漢土馬步官軍民
兵命三司都指揮周佐等按以成算督率分守指揮
馬鉉等分道進兵攻散其衆斬獲尅習男婦百餘
賊平復請添設大羅衛兵川州以爲保障從之 朝
廷嘉其功賜勅獎諭尋遣使賜以盜甲壬寅奉 勅
偕都御史程公琮往撫孟密所過州縣秋毫無擾時
有以平孟密方略獻者公斥之曰自征麓川以來軍

民凋弊極矣我寧被不善控禦之名不忍復事窮兵
黷武之禍聞者躩之癸卯橋甸賊首師五聚衆爲亂
張旗幟稱總管剽剝鄉村焚毀廨宇支解軍民敵殺
官軍安寧鎮南廣通祿豐易門十數州縣咸被其害
乃與鎮巡重臣合議命三司都指揮趙晟等調漢土
官軍民兵分道進攻斬首千餘級俘男女數百人生
禽師伍暨其妻孥境內始安具錄將校首功以聞

朝廷特賜勅歷敘公在鎮功績加授太子太傅以嘉
獎之乙巳南窩蒲賊莽丘負固距險搔擾永昌等處
地方行旅不通民多殺傷復命晟等率兵以往且諭
之曰山路險阻難於攻圍宜以計取至則果如公命
生擒莽丘及同惡渠魁以歸宥其脅從一境悉平弘
治改元戊申 今上卽位之初念公久鎮外藩特遣
使賜以白金文綺已酉賞平橋甸功將校陞秩有差
復遣使賜公白金文綺公生勳胄穎敏過人端勤有
守苞苴不敢及門精究武經諸家兵法及陰符奇門
諸書知用兵之要每命將出師算無遺策所向有功
平居孳孳嗜學手不釋卷至於陰陽卜筮星命之術
靡不究心善草書自成一家歌詩樂府富麗可觀性
孝友自痛早孤事母竭盡子職及卒哀毀喪葬以禮

待族黨咸有恩意御下寬而有制不事嚴刻雅量汪洋喜怒不形勢位已極戒滿思危兢兢業業未嘗有過衆方以遠大期之而遽正於斯惜哉其生爲景泰庚午閏正月十有三日秋四十有七而已配王氏成山侯某女繼王氏金吾左衛指揮同知某女皆封黔國夫人

黔國公諡莊襄沐公崑墓誌銘 蔣 冕

自黔寧昭靖王以西平侯奉 高皇命統兵下雲南留鎮其地繼以王之伯子惠襄侯仲子定遠忠敬王及忠敬之子榮康公未幾而忠敬叔弟定邊伯武襄之孫右都督東樓居士繼之旣而東樓之弟都督同知與榮康之子武僖又繼之以至於公首洪武癸酉訖正德乙卯公卒之年傳五世歷八人閱百四十年世篤忠貞敷宣德意綏輯民夷前後如一日忠敬在鎮餘四十年佐以武襄雖國封啓于忠敬而益固封守安內攘外則武襄之功尤不可泯者武襄諱昂公之高大父也曾大父諱 錦衣衛副千戶贈右都督大父諱瓚卽都督同知父諱誠錦衣衛都指揮使充右叅將嗣守金齒母徐氏生母李氏俱封夫人以成化壬寅某月日生公生甫九閱月而叅將沒大母賈

議嗣
憲國

夫人育之弘治庚戌賈夫人沒公雖童孺已哀毀如老成人明年授錦衣衛指揮僉事以年纔十齡如例優給初武僖無子以公爲後丙辰武僖卒廷議謂公於武僖爲從孫止宜嗣昭靖初封侯爵事下雲南守臣覆議咸謂百餘年來雲南人習知黔國之稱一旦改公爲侯而稱西平恐人心驚疑或致生變 孝廟俞其議命公不必赴闕就彼嗣公爵勅佩征南將軍印鎮守雲南時弘治丁巳之十月巳卯也踰旬仍特詔諭公親賢取善修德進學以不墜先烈公旣拜稽首受命旦夕惴惴思所以仰副聖訓以光世美者事

無大小必謀之寮案訪之耆舊務俾允合人情不違法制而後行之令嚴而不苛法簡而能信自食采外毫髮不取于人所部文武吏士蠻夷酋衆無不服其廉靜政務旣修乃簡閱士卒繕治城守汲汲以攘寇安民爲事庚申統兵勦龜山竹子箐及梁王山等處蠻賊寇平而人不擾辛酉孟養侵孟境土檄三司撫諭之復其村寨十三處壬戌偕巡撫都御史應城陳公會貴州守臣合兵討普安賊婦米魯及蠻賊福佑等首惡就戮餘黨悉平正德丁卯師宗州賊張受辛未安南長官司上舍那代相繼扇亂流劫隣近郡邑

公次第勦平先後事聞降勅褒諭者三加歲祿至百石者再賜白金文綺者五丙子加太子太傅丁丑以母夫人李氏柩將祔葬南京祖塋懇乞護送疏至三上 朝廷以公未可離任不允而優詔褒答特深委重焉已卯六月十八日以疾卒于正寢得年三十有八訃聞 天子嗟悼輟視朝一日命有司給棺斂賻米五十石布以匹計者如米之數贈特進光祿大夫右姓國太師賜諡莊襄公諱崑字元中姓沐氏別號玉岡自幼端慤凝重寡言笑喜愠不形於色說者謂其 息敬風槩而學問之力尤有過人者天性明敏

好學不倦未弱冠於六經子史騷選與夫紀事纂言諸書多所記覽偶爾談及輒疊疊弗能休稠人廣坐中分韻賦詩伸紙立就酬答書疏會議政務皆出手筆公餘或憇棲鳳亭或登望宸樓招延賢士與之討論文義往往至夕忘倦先師大學士瓊臺丘公嘗記武僖忠愛之堂公讀而愛之手書數過刻置廳事日必三復焉先世述作文字亦多編錄刻梓以傳於世家入子弟中擇其俊秀者習字學使之錄家乘及古今異書強壯有力者讀兵家書操演武事蓋恐其閒逸無所用心或博奕飲酒漸至驕惰也公雖酷嗜文

不嘗玩物喪志冠帶終日勤於政理在鎮二十一年始終無少異

成國公贈東平王謚武烈朱公能神道碑

楊士奇

東平武烈王姓朱氏諱能字士弘世家鳳陽之懷遠父亮從太祖皇帝征伐有功累陞武毅將軍燕山中護衛副千戶謹持行善撫士有譽於時母某氏生王有令質自少喜讀書事父母至孝洪武甲戌襲父職事文皇帝於藩邸小心慎恭未嘗少懈而撫恤下人一如其父甚爲上所信任旦夕侍不去側奉天靖難之師初興帷幄密議惟河間忠武王與王預焉時北平三司之交構造禍者王與忠武建議率麾

下首擒之遂奪城九門撫綏城內外三日人以大定
引兵攻薊州擒其將都指揮馬宣等遂取遵化永平
密雲從 上攻灤河旣還從克雄縣首破其東門敵
衆敗走追及於月漾橋執其總師都督楊松潘忠等
復追其餘衆於漠州斬獲不可數計乘勝長驅入眞
定大敗長興侯耿秉文兵時王獨與敢死士三十餘
騎追奔至滹沱河秉文衆尚數萬復列陣嚮王王奮
勇大呼衝入敵陣敵衆披靡自相蹂躪死者無算棄
甲來降者三千餘人 上大悅賜書褒諭永平馳報
江陰侯吳高以遼東兵攻城急王從 上赴援高遁
走王追及之多所殺獲遂從定大寧戮其拒命撫輯
其衆而還時曹國公李景隆率兵攻北平城王從
上至鄭村埧與景隆兵遇大戰敗之進攻其營又敗
之景隆兵列營九門者連敗之城亦出兵夾擊景
隆狼狽走王從攻廣昌蔚州大同次第悉下景隆復
收潰散之卒號百萬來攻 上親拒之王爲前鋒午
至白溝河敗其都指揮平安軍及申又與敵兵戰大
敗之明日王領左哨當前鋒又大敗敵兵盡克其砦
柵敵走保濟南王率衆追之至鐔山敵嚴兵列陣以
待王連破之敵衆釋兵降者萬餘人王以聞 上悉

撫而縱之蓋自是敵兵戴德皆願來歸無復鬪志然
上得之卽遣之不留王從攻滄州先破其東門入
城斬首六萬餘級敵震懼遂獲其總帥徐凱進攻東
昌敵列陣決戰 上以數千騎出陣後敵圍 上數
匝王奮力翼 上以出進戰夾河王爲奇兵先鋒大
敗敵將盛庸兵又敗平安兵于藁城追奔至真定戰
其東門斬首萬餘級遂略彰德及定州勦西水寨已
而敗敵將李文於德州遂克東阿東平破汶上諸寨
設伏淝河敗平安兵十餘萬進戰小河爲敵所乘稍
却諸將遽請旋師獨玉力勸上行日用兵未必常勝

豈可因小挫輒自沮項羽百戰百勝竟亾漢高屢敗
而終興自殿下舉兵來克捷多矣此小挫何足置意
但當以宗社爲重整兵前進耳 上撫掌嘆曰爾言
深合吾心遂行至靈璧敵盛兵迎戰王先登陷陣大
敗之生擒其副總兵陳暉平安叅將馬溥徐真及都
指揮三十餘人獲馬二萬敵衆死者屍蔽原野降者
十萬人悉縱遣之進克泗州渡淮敗盛庸兵遂克盱
眙下揚州從 上渡江入京師內難平諸王臣民推
戴 上承大統論靖難功王居首賜號奉天靖難推
誠宣力武臣特進榮祿大夫右柱國左軍都督府左

都督封成國公食祿三千五百石子孫世襲賜誥券
追封三代考皆成國公妣皆成國夫人永樂二年命
兼太子太傅四年安南黎季犛弒其國主毒虐下人
拒遏詔使數諭弗悛遂發兵討罪命王總兵佩征夷
大將軍印率左右副將軍左右叅將及神機橫海驃
騎遊擊鷹揚五將軍兵八十萬討之臨行 上親送
之龍江師至廣西 上顧侍臣曰朕夜察天象西師
有憂其朱能乎然能足辦斯事朕第慮氣候非其所
習耳踰旬訃聞 上震悼輟視朝五日一時同王從
舉義者永康侯徐忠等十數人皆入奉慰 上灑泣

曰方艱難特協力一心相濟能其首也且其素存心
行事皆應遠到曷遽止此言已益酸楚左右皆流泣
莫敢仰視蓋王至龍州嬰疾薨十月初二日也春秋
三十有七 上親為文祭之宸衷悲愴溢於言表讀
者皆為泣下賻卹特厚追封東平郡王賜諡武烈并
加贈其三代皆王爵 仁宗皇帝臨御時詔王配享
太宗廟廷賜祭之文尤極褒重蓋當時元功之首也
成國公贈平陰王諡武愍朱公勇神道碑

李賢

王姓朱諱勇字惟貞世家鳳陽之懷遠衛累業多著

令德祖諱亮當元末天下土崩乃從 太祖高皇帝
屢立戰功歷陞燕山中護衛千戶考諱能才略過人
克承前業當 太宗文皇帝靖難之初以心膂之寄
獨克奮力所向必捷功居第一授封奉天靖難推誠
宣力武臣特進榮祿大夫右柱國太傅成國公永樂
四年安南爲亂命掛大將軍印率師往征之未至歿
於軍追封東平王謚武烈賜以誥券逾年王襲公爵
聞王自幼岐嶷不與凡伍出就外傳無統縠豪華之
習 澹泊自處與韋布之士同讀書不事尋章
求其要領於忠孝之大義利之微辨之弗明弗

主師席者爲之擊節驗其所履殆無違焉爵旣在躬
恭勤益倍無一毫驕態見於言面而敦厚簡靜之譽
籍甚 文廟大異之日加眷注巡狩北京扈蹕往來
歷掌帥府留守南京蓋老成可託故委以心腹也王
握兵權號令不繁訓練有法不怒而威時 仁廟監
國尤見禮重十八年命王隨侍北京二十二年從駕
往征北虜有勞績及 仁廟繼承大統眷顧益隆左
右股肱不二三人而賞賚優渥王獨加焉未幾 宣
廟嗣位以王勳舊恩典頻繁白金文綺之賜極厚宣
德初宗室有謀爲不軌者京師震動王密勸 上親

率六師以征之遂用其計兵出近郊忽雷雨大作王知吉兆遂白於上曰天意有在不戰而克遂計日兼行師至圍其城彼方大驚不意上親征而兵至之速也卽日出降罪人旣得乃班師還京而運贊之功在王爲多於是白金楮幣人口之賚特兼之焉三年隨上北征沙漠有功加太子太保特命總管大營兵權王益殫心極慮務精訓練兵威大震上深倚重嘗御製重陽歌揮宸翰賜之五年上以南北兩京及沿海陝西諸軍操備漕運遠近相乖請以南軍漕運北軍操備沿海陝西諸軍還營操守上從之

人以爲便自是每歲巡邊謁陵必命王綜理其務屢有金綺之賚六年冬至以京軍分調大同一帶防守者多進言恐非居重御輕之意上以爲然乃命兵部選精兵六十萬以益之七年上慮勲臣子孫過於優逸後不堪事于是屬王督練之而武藝遂精時萬全諸軍勞民供餉王進屯種之計以息轉運又言減放宣府調操者及留宣府諸軍備遼者悉准行之九年扈從巡邊慨然欲選將士抵其巢穴以勦絕之會胡虜自相讐殺阿魯台部落離散多相率衆順遂還十年正月今上皇帝嗣位之初王宿衛禁闈防

範嚴密介胄不除久之益重委託金綺幣楮之賜尤
侈王愈感激竭誠輔導兼知經筵事每偕儒臣進講
以成聖學王以爲天下雖安不可忘戰復奏選銳兵
四萬以備邊用正統改元之秋 上勅王曰勲臣子
孫襲爵者操習之暇令讀書史講明理義以成其才
爾其體朕至懷王於是親爲講解書史大義至於忠
孝之道尤懇懇焉後各有成立之效四年加授特進
榮祿大夫右柱國九年邊報有警王統兵出喜峰口
敗虜寇於富峪川追及熱水川俘獲人口馬駝牛羊
還以功進太保復賜蟒襲并介胄十四年虜寇犯邊
王復領兵隨駕往討之還至土木不意胡兵來襲進
逼宣府 上卽命王提兵四萬以禦之至雞鳴山會
虜前鋒少却王促兵援之殺傷甚重已而虜衆悉至
王遂力戰以死是年八月十三日也距生洪武辛未
七月二十二日壽五十有九天順改元 皇上復登
大寶重念往者死事之臣賜王誥命追封平陰王謚
武愍王配王氏都督官同之女閩範素閑克相其家
封成國夫人子男二儀襲公爵佶任指揮使女五

成國公贈太師謚莊簡朱儀神道碑

公姓朱氏諱儀字炎恒世爲鳳陽懷遠人祖諱亮元

末時從 太祖高皇帝起義兵累功授燕山中護衛
正千戶祖諱能嗣職從 太宗文皇帝靖內難以元
功封國公加授太傅追封東平王謚武烈配享太廟
妣封東平王夫人曾祖祖考皆封王妣皆王夫人考
諱勇嗣成國公爵歷事累朝皆總大兵掌中國中軍
都督府事以功授太保正統末從 英宗睿皇帝北
征歿于土木追封平陰王謚武愍妣沐氏繼妣王氏
皆封夫人公王出也生而器宇凝重具文武材景泰
壬申嗣成國公 景皇帝當祀太廟偶不豫夜宣旨
遣公攝事倉卒無違禮丙子命治周世子喪財省事

集天順丁丑 英宗復位見公曰平陰有後矣 孝
恭章皇后之合葬景陵讓皇后之改冊皆命公行禮
有游幸或名以從壬午命持節封蜀王勞錫無所受
嘗較射內苑連中的 上喜甚賜寶鏹一篋蓋自是
始有意火用之癸酉南京守備官缺勅公往兼掌中
軍都督府事賜白金三十兩金織蟒衣一襲甲申
憲宗純皇帝嗣位申命以行時南畿飢命公賑救公
議令獄囚贖米及都城商稅錢鈔皆市米諸藩給僧
牒亦准是法所活甚衆時游食頗盛公議京伍未實
宜使此輩應募爲兵得若干人鹽徒彭釗強賊李相

爲江路患將校跡至九江獲馬儀真守備官缺薦都
指揮勝勝果以廉明官至總漕都督戊子旱奉勅會
讞獄囚多所矜釋又議都郡歲輸軍儲許臨船預放
三月省耗數船直得十餘萬石貯於倉倣古常平法
行之會有詔諸守臣符驗皆進繳公言南京根本地
事有緩急非符驗不能速達又遣官勾稽營籍公言
舊制軍數不宜泄事皆寢城門守兵盡肆營伍止留
老羸數人公謂宜養銳示威始定蕃代法議久不決
後四年公復力爭又言營卒多病死請官置醫藥皆
從之 今上皇帝之正儲位也廷臣方表請公率南
京諸大臣上表適至降詔優答且賜綵幣海賊劉通
勢甚猖獗衆議欲招之公謂必先讐以威乃遣舟師
分據要害賊勢窮歸罪械其首惡三十三人送京師
脇從者皆釋弗治海道以寧乙巳星變求直言公所
陳多切時弊屢上疏辭任詔以公廉靜老成不許加
太子太傅視事如故 憲宗旣升遐公哀慟極至燕
不舉樂者三年 今上御極賜綵幣一襲白金二十
五兩公復辭任亦不許有言武臣多不畏法請嚴降
黜之令公言皆是祖父功所積且律有法豈宜槩黜
遂報罷辛亥 皇太子生公首請正儲位受賜如前

梅發
通羅
夷人
買子
安

孝陵明樓壞公請修葺之又言欽山十廟亦當修二
後成有旨嘉勞刻石紀功大勝龍江二關及浦子口
教場爲水所迫亟請內圖以免衝啣暹羅夷人入貢
還泊龍江市中國子女爲奴婢事覺或言宜寘不治
公以爲事關國體遂舉正管押通事官追給夷價各
遣歸每歲錄囚公當執筆必從容訊問務求其情尤
嚴祀事凡代事南壇太廟者各四社稷山川孝陵及
大江之神各三以常典祭者多不可紀皆夙戒發未
嘗少怠内外文武臣所與議事者前後四十人公處
之皆寅恭協一久而彌篤當弘治丙辰三月六日卒

于止寢公始得疾卽上疏辭 上優詔勉留遣醫視
疾命甫下而訃至矣 上震悼輟視朝一日賜誥贈
特進光祿大夫右柱國太師謚莊簡公疎髯豐頰面
如頰玉簡重寡言平生忠孝出于天性痛欲死難誓
欲雪恥沙漠旣官于南不得遂志每燕坐憤恨灑淚
我先王安在而我享此祿乎賜第中道石寢圯或請
修之曰此石先王所履吾不忍易也事母夫人極能
順志孝養居喪毀瘠去墓百餘里徒跣以行弔者雖
微亦拜謝于門庶弟佶廕羽林前衛指揮使父沒財
產聽其自取及佶卒撫其子輅亦厚都督僉事郭鉉

之毋公女兄也嘗迎養于南餽送至殷勤馬遇姻黨
皆恩義好拯人急嘗早朝道得遺楮追其子還之使
歸至德州見鬻子女數輩盡收買之復遣其歸不取
其直家人梁敏者廣東人娶婦生子矣其父見之徘徊
不忍去公憐而遣之福英者鳳陽人爲盜所賣窮
而歸公廉知其父止一子亦遣之有鬻子于倉官者
官滿子戀母不肯行公贖歸之今襲爵千戶有父母
道歿舟人棄其女於江涯公命有司收養後嫁百戶
王隆爲命婦公好讀經史攻大小楷法間吟咏聲伎
狗馬一無所好臨財不妄取而贈施皆從厚故雖爵

上公歲祿恒不給禮賢下士至忘勢分汲引人物寸
長片善必加甄錄武學官士躬自課試官將領登科
第者相望尤識治體蒞政之初喜事者或有異議公
謂留務至重不宜作聰明擅威福安有更改守之不
變久則民安而信之不疑矣守備三十餘年上下輯
服軍民安堵外警不作古所謂無智名無勇功深長
爲國之謀明哲保身之義兼盡而無遺矣顧事涉綱
紀則力爭之爭之不得則嘆惋累日恒曰事體易壞
復之則難知者以爲名言配胡氏少傅忠安公之女
封成國夫人賢而有則子長輔公教以忠義病革執

其手以指畫將士二字示之今輔嗣公爵恭謹有父
之風

成國公贈太傅諡恭僖朱輔神道碑

徐階

公諱輔字廷瓚東平武烈王之曾孫平原武愍王之
孫守備南京成國莊簡公之子武烈以靖難元勲配
享成祖廟庭而武愍死土木之變忠孝聞天下至
公思益光大先世之烈遭世承平無以自見賜第有
古槐一時時挾書冊就其陰卧且讀焉因自號枕槐
又數從姊丈李文正公學爲詩長短篇什流傳縉紳

間而被服淡素言動恂恂如諸生諸縉紳相與稱曰
儒者正德丙子秋虜寇白羊廷議遣將往禦公毅然
請行旣奉詔佩平胡將軍印充總兵官會虜退而止
丁丑守備南京己卯逆濠犯安慶遠近震恐公與司
馬白巖喬公畫策戰守以身任其安危賊覘知遁去
遂以敗縛人于是知公古馮異祭遵之流亞也辛巳
召還京嘉靖癸未予幸舉進士公實主宴恩榮釋褐
之日予從兩同年修故事謁公私第公豫爲具以俟
屬有風霾詔百司修省狀元姚君請公撤酒與樂公
曰上未必知也姚君曰人臣之義固當不欺公柰

何以教後進耶曰吾姑試君君言誠是雖然吾願君他日無忘于茲言也遂進蔬食見其二子麟鳳再拜以別今三十餘年予每念此不異前日事而公則已久不可作二子亦次第嗣爵卒矣予蒙恩入直無異間與公孫今太傅公追論疇昔爲之惻然太傅兄弟因屬予銘公神道之碑予不得辭太傅公名希忠以忠謹修雅爲上所眷倚其弟希孝爲右都督管錦衣衛事恭慎而甚文皆公次子嗣公鳳出

成國公追封定襄王謚恭靖朱希忠神道碑

張居正

今制異姓不王惟元功佐命有大勲勞于國者歿乃得追封焉 明興以來朱氏王者三人東平從 文皇帝靖難用決策力戰封平陰歿土木之難今定襄又以忠勞受知 三聖得賜封如其祖夫朱氏之先豈亦古神明之胄耶何其歷世久遠寢隆寢昌也初

世宗肅皇帝南幸承天道衛輝行宮夜火侍衛倉卒不知駕所在獨王與陸都督炳翊 上以出世宗常言諸從我於難者功當與開靖等項余侍 今上於便殿會有司奏王卹典引令甲非軍功不王 上獨顧余言希忠昔事 皇祖有扈蹕功 皇祖遇之

甚厚朕今推皇祖意王之不爲踰制遂定封爲定襄王謚恭靖孝哉冲聖乃能追念先德不怠迨其所親信故臣也定襄王者諱希忠字貞卿其先鳳陽懷遠人七世祖亮從高皇帝起義以功授燕山中護衛正千戶六世祖肇封成國追封東平武烈王能五世祖平陰武愍王勇曾祖太師莊簡公儀祖太傅恭僖公輔父太傅榮康公鳳母成國夫人陳氏王生而警敏絕人稍長通尚書周易兼涉韜鈴有文武志略嘉靖丙申襲封成國公年甫二十一初拜表謝恩世宗望見王丰度秀整獨偉稅之自是遂被恩顧

承天府奉命告祭顯陵戊戌上皇天泰號充捧策表進使禮成加太子太傅世宗將有事顯陵召王與勲輔諸臣於慈寧宮幕次及文華殿南城議南幸并冊立東宮事日見親信己亥正月世宗御啓祥宮名諸大臣見皇太子特命王扶掖皇太子以行因指示皇太子曰此汝將來師保也二月使持節冊封穆宗爲裕王聖駕南巡佩都護副將軍印掌行在左府事至衛輝以身衛上出於火渡河侍御舟賜詩命和王操筆立成上謂輔臣曰勲裔中如此人才絕少稱善者久之是歲秋充神

機營總兵官庚子提督團營及五軍營王堅明約束
撫循將士軍整以和壬寅夏掌右軍都督府事督營
如故秋加太保丙午加特進榮祿大夫太傅庚戌加
特進光祿大夫柱國九月虜穿塞直薄近郊王部署
諸將卒晝夜捍禦虜知有備遁去解嚴加兼太子太
師癸丑改掌後府事壬戌加太師王力辭不獲乃拜
命 穆宗踐祚奉勅監修 世宗實錄知經筵事
上眷倚方隆而王以疾不起時萬曆癸酉九月三十
日也王歷事三朝中間代祀園丘三十有九方澤二
十有九他中祀尤衆穆宗及 今上加冠俱王持節

掌冠進士恩榮宴者十九先後蒙被恩澤賜泛舟太
液賜肩輿賜祕書賜禁中乘馬廕子錦衣者三歲加
祿至七百石諸衣帶金幣器物人口之賚不可勝紀
其卒也 上震悼爲之輟朝賻祭營葬皆視舊制有
加至特賜追封王爵尤爲異數云王器宇凝重至性
夙成始弱冠卽受知 世宗恩寵舉無與比然以是
益斤斤勤恪每奉命攝祀必端肅熏沐致其精潔臨
祭登降周旋咸中準度 世宗在位久以威嚴馭下
雖素所親任輔舊往往被譴斥唯王以忠慎自結於
上 世宗嘗稱之曰恪恭敬慎曰忠謹勤誠又曰卿

可謂爲臣允忠以故獨被隆眷三十年無絲髮不當
上意指者逮事 穆宗及 今上以累朝勲碩百辟
具瞻而小心翼翼始終一節進止殿陛皆有常度不
失尺寸事父榮康公冠帶侍養立終日不歆仄母陳
太夫人病亟王方直西內不敢言歸憂形於色 世
宗見而異之以問輔臣具以實對乃諭令歸視母病
無何陳夫人卒王哀毀骨立與其弟左都督掌錦衣
衛事太保公希孝友愛篤至朝夕過從怡怡如也撫
庶弟希慎無殊同胞與士大夫處貴而能降久而彌
敬飲酒至數十斗雖大醉終不失一語練於國家典

故而口呐呐若無所知每廷議大事常遜居後不敢
發端或稱引川言咸中肯窾 世宗晚年諸大典禮
卽輔臣有不及知者常命問王以王少在左右明習
故事也然不問卽終不言其周慎如此余嘗以爲王
兄弟孝謹如石慶石建而才略過之其重厚可屬大
事如金日磾而文雅風儀日磾遠不及也桃李不言
下自成蹊王生平篤厚謹飭未嘗自表異希稱譽而
士大夫咸稱傾慕之唯 天子以爲國器歿之首弔
客皆爲掩涕嗟乎非其中心誠信孚於人烏能得此
乎



